

叢書  
嘉業堂

傅與礪詩文集

第二冊



傅與礪詩集卷之五

七言律詩

道士磯阻風過呂相墓

危檣風急晚相依閒謁荒墳弔落暉白酒暫謀同輩飲  
青山因感昔人非荆襄萬里空殘堞吳楚千帆掠斷磯  
今古高門總丘墓英雄何用苦沾衣

韓淮陰廟

淮陰萬古英雄恨楚樹荒荒夕照殘水夾廢城春草合  
雲昏遺廟野花寒封齊安用眞王印興漢空餘大將壇  
高帝旌旗俱寂莫斷碑零落後人看

桃源道中

憶曾親到武陵回忽遇桃源偶自猜豈有水通仙洞去  
祇疑花映縣門開日明畫戟官船上風獵黃旗御膳來  
想得故園寒食節共言游子近燕臺

宿遷舟行

天涯風物最關情每問舟人計驛程幾處新蔬隨晏食  
誰家艷杏照春晴水通淮海波濤壯地入青徐土壤平  
正憶祓除逢上巳可慙寥落過清明

黃河

黃河萬古來天上白日千雷鬪地中浮水巨龕時出曝  
傍巢靈鵲自知風神珠化濁何由得仙木尋源或可通  
聞道千年聖人出此生何幸見時豐

徐州

斷山數里見浮屠水樹微茫映日疏舟楫盡經危石過  
人煙稍近白雲居朱陳縣遠思遺俗楚漢臺荒想故墟  
萬古風帆自來往新詩吟罷獨躊躇

沛公亭

遙山寂寂對危亭壞礎欹沙柳自青四海久非劉社稷  
千秋猶有漢精靈豐西水散煙沈浦碣北雲來雨入庭  
坐想酒酣思猛士歌風臺下晚冥冥

濟州遇大風

黑風揚海只欲翻黃塵蔽天愁卽昏牽江百丈有寒色  
轉野孤蓬無定根少年涉歷深世故長路艱難銷客魂

坐笑杞人真不慧浮生久已信乾坤

會通河伯祠晚眺

水神祠下晚維舟閒倚穹碑誦遠遊西日射雲明獸尾  
北風吹土集貂裘漳川近繞幽燕出汝水分兼濟漂流  
過客豈知疏鑿苦當時荷鋤幾人愁

至京

京國古爲形勝地野人今識帝王居無時雲氣浮金闕  
盡夜奎文映玉除豈復常何須論事蚤聞司馬已成書  
袖中獨有長楊賦欲向何門曳客裾

詠懷

一春風浪淹行客六月塵埃滿上京都館朝煙同杵臼

故園暮雨隔柴荆西州近日猶防寇南詔經年久用兵  
獨夜起瞻龍虎氣五雲終繞鳳皇城

駕發

天門曉啟黃金鑼路馬遙翻碧玉蹏銀燭熒熒花外出  
翠蕤冉冉柳邊迷千官劍佩屯雲合五衛旌旗擁日低  
後夜龍沙駐清蹕侍臣不寢驟鳴雞

呈王繼學大參時領江東憲

丈人文律擅風騷往昔朝中屬望勞宣室近聞徵賈誼  
漢廷重見遣王褒蒼松雪後森森直玉樹風前凜凜高  
幾處瘡痍待蘇息遙瞻使節下江皋

蚤年弄筆向山阿行徑春深長薜蘿逸駕未能攀屈宋

苦心虛擬過陰何南遊澤國黃塵滿北望都門紫氣多  
最說蓬萊舊仙伯妙音時復奏雲和

登樓

樓上秋風吹畫屏樓前秋思滿都亭金河水去涓涓碧  
瓊島雲來冉冉青近見蕭何成第宅舊聞汲黯在朝廷  
明時進用多英傑迂腐深慚守一經

秋興

天上旌旗卷暮寒人閒鼓角送悲酸瑤池落日迴青鳥  
月殿浮雲掩素鸞楊柳漸稀秋瑟瑟芙蓉已老露溥溥  
砧聲苦近南鄰客寥寥落羈懷強自寬

落木蕭蕭滿帝畿候蟲處處趣寒機客星入斗秋深見

神女行雲日晏歸復喜諸公扶社稷憐弱弟奉庭闈  
短章諷罷頻回首目送江南鴻雁飛

梧桐樹晚細含煙閨闥門深總映天龍去鼎湖雲漠漠  
鶴吟華表月娟娟東都日望金輿發南徼猶驚羽檄傳  
只在忠良勤夙夜五陵佳氣故依然

白日遙看錦繡懸重重樓閣隱青煙化城或在諸天外  
方丈長疑弱水連每說神僧飛杖錫更聞童女上樓船  
西風日暮何蕭瑟一度憑高一惘然

敝裘已畏早寒侵歲月祇驚久客心莫倚長卿能作賦  
始知季子故多金天門守虎星辰冷雲氣從龍霧雨深  
直北關山時極目昔人聊復短長吟

題張齊公祠

將軍結髮事先朝，百戰山河血未銷。  
總說霽雲能慷慨，兼聞去病最嫖姚。  
煙塵劍戟迷秋峒，風雨旌旗落暮潮。  
自古英雄須廟食，精靈何待楚辭招。

送湘中李從事赴郴幕

長沙上游山水窟，郴陽自古說名邦。  
天圍翠岳連三楚，地合清湘赴九江。  
歸去收書經石室，坐來挂版對雲窗。  
西風慘澹都門別，莫愛青樓倒玉缸。

和宋子與病中

知君憔悴對醫師，總爲庭闈接夢思。  
去國休題王粲賦，憂時苦愛杜陵詩。  
關河落日傳飛箭，城闕高秋建畫旗。

自有羣公勤輔翊不妨羈旅暫棲遲

寄漢陽黎暹州

郎官湖頭秋月輝大別山下暮煙微  
鄰家竹好題詩到別墅花濃放棹歸  
稚子攤書黃葉下野人送酒白魚肥  
惟應對客多情興解念征塵染素衣

寄馮架閣

風沙獨走燕臺路秋思長懸楚觀雲直北橐駝終日見  
向南鴻雁幾回聞過門每憶逢春雨迂轡能忘坐夕曛  
數就行人間消息知名總說漢馮君

崇天門朝賀

輦路塵清列羽林侍臣星嚮肅森森風含鳳吹青冥闊

日射龍旗紫極深兩廡佩趨臨水玉九門詔出映泥金  
從來湯武須傳業更在伊周老盡心

雪中次元茂才

北闕今晨雪滿墀腐儒憂國畏人知月寒弱水迷三島  
雲暗蒼梧失九疑瑞木細飄天上葉梅花潛發嶺南枝  
山陰那得乘佳興起繞前軒自詠詩

客館對雪

主人並馬清晨出獨客搖毫白晝吟空院雪花時近眼  
故園梅蕊總關心天迷漢節南征遠日冷燕臺北望深  
但使年豐成國用敢論遊子少黃金

元日

漂零京國逢元日俯仰乾坤任四時天上椒花虛作頌  
江南梅蕊廢題詩三山日動蒼龍闕五筦雲迴翠鳳旗  
元老議成周典禮小儒思見漢官儀

正月十七日麗正門觀迎接口號

南徼旌旗萬里迴中天城闕九重開龍門仗簇青雲起  
鶴禁香通紫氣來父老多流去日淚公卿不乏濟時才  
已聞奉璽歸金室早聽趨朝進玉杯

和宋架閣病後出遊

近說能詩宋之間還同多病漢相如出門跨馬驚春晚  
臨水聞鶯似夢餘柳邊苑路通飛觀花底宮泉溜決渠  
每歷鳳城多雜興須君把筆更來書

送賀尙書致仕後赴召上都

使者微行立曉風宰臣傳詔守離宮關中舊憶留蕭相  
江左俱看起謝公路經琴峽秋聲滿天繞灤河御氣通  
聞說至尊勞睿想莫令行色後賓鴻

送唐子華赴嘉興照磨

子華名棟 □□人善畫

聞君秋思滿南湖行李今晨發帝都幕府初乘從事馬  
江城還憶步兵鱸樹浮白日山侵越潮蹴青天海入吳  
閒暇憑高動詩興須成一醉埽新圖

和孫太常元日

日射天門海霧晴雪飄仙路嵒風輕柳邊仗出開旛影  
花底朝回散佩聲爲客頻占新歲事思親復起故鄉情

不論萬里羈離苦惟願中朝政化平

澧陽橋

謝家作橋涔水上行客題詩江霧中天接五谿南去永  
地連三楚北來通青龍暮見雲汀溼烏鵲秋閒月渚空  
聞說道旁多駿馬何人環珮立西風

次韻春雪

才見天花散碧寥卽看庭樹失青條侵香靜向金虬滅  
拂舞輕兼綵燕飄只怪春叢俱爛熳可知年穀最豐饒  
蹇驥暮出多詩思卻恐旁人擬灞橋

出郭

晴光縹渺汎青春遠色氤氳動紫塵出郭自因芳意早

尋谿兼得野情新  
花邊古寺翔金爵  
樹底高墳臥石麟  
郤倚層丘望城闕  
上方雲氣繞龍鱗

送會稽方涿道之松陽令

松陽令尹之官去  
三月都門柳拂衣  
作郡舊聞成式在  
去鄉今見買臣歸  
春花繞縣居人滿  
秋柿連村過卒稀  
從此弦歌徧閭里  
看君鳬鳥近雲飛

寄河閒趙運使

雪盡官河春水生  
移家還出鳳皇城  
竹閒退食占靈鵠  
花外題詩聽早鶯  
鹽井青煙晨縹渺  
漕溝素月夜分明  
京華久客遙相憶  
欲託音書不稱情

送臨川僧明極

天寧堂中雲所居生公聚石意何如山前振錫應逢鶴  
池上開函或召魚有時風樹鳴珠網當晝天花墜寶書  
豈憶今晨送師處薊門南望說鄉闕

送馬伯誠書大典恩授學官待次歸

蚤聞獻賦擬揚雄晚信傳經出馬融載筆舊登天祿閣  
將書能到大明宮苑花送酒歸時發江樹迎船去處通  
會待詩書化千櫓青燈重約故人同

送杜德常御史赴西臺

御史才華舊省郎翩翩雲路起鳩行天回紫閣明奎璧  
地切烏臺動雪霜分陝定存周禮樂過秦猶有漢文章  
欲因巡郡還搜訪別酒臨風意獨長

繡衣此別定如何驄馬西行處處過驛樹蒼茫連灞滻  
江花浩蕩過岷峨三秦久訴誅求盡六詔仍聞警急多  
早聽封章切肝膽爲憐編戶困干戈

憶到京華未相識將詩往往向人傳祇慙燕石登重匱  
豈有驪珠出九淵青雲滿路逢傾蓋白日臨歧送著鞭  
好去城南訪遺譜杜陵自古盛才賢

送方從事赴潮州

闕下風流祕省郎移官萬里向潮陽樹邊海氣浮天闊  
雲底瀧流出地長見客惟應辭薏苡思親定復倚桄榔  
諸公佐郡多能事日對韓山送酒觴

都門十月把征衣腸斷千峰木葉飛江上也知鱸膾美